



# FIR DATT D'KIERCH AM DUERF BLEIFT!

D'Gambia-Partei waren ugetrueden, fir Lëtzebuerg gesellschaftspolitesch ze "moderniséieren". Dozou huet och déi ominéis „Trennung vu Kierch a Staat“ gehéiert. Wat ass dann d'Resultat vun dëser Operatioun?

- De Reliounsunterrecht ass an der öffentlecher Schoul ofgeschaaft.
- D'Kierchefabrécke sinn enteegent an ofgeschaaft.
- D'Kierchegebaier sinn ouni Récksiicht op déi reell Propriétéitsverhältnesser de Gemengen oder dem „Fong“ iwwerdroe ginn.
- D'Gemenge mussen Loyer fir d'Kierche froen an dierfen net méi fir lafend Käschten opkommen.

Dat alles ass net am Dialog, mee mat der Briechstaang duerchgesat ginn. De Banneminister Kersch huet esouguer säi Versprieche gebrach, den Accord tëscht dem Bistum an de Kierchefabrécken ze respektéieren. Hien huet esouguer refuséiert, de SYFEL als legitim Verriedung vun de Kierchefabrécken och nëmmen unzehéieren.

## **D'Aarbecht vun ongezielte Benevollen ass ignoréiert a mat Féiss getrëppelt ginn.**

Den eigentlech zoustännege Kultusminister Bettel ass ënnergedaucht an huet de Pafresser Kersch gewäerde gelooss. Dat a flagranter Verletzung vum Arrêté grand-ducal iwwert d'Zoustännegkeete vun de Ministere. Du jamais vu!

Hannert deem ganze Manöver steet eng extrem kierchefeindlech Astellung an d'Absicht, d'kathoulesch Kierch ze ruinéiere respektiv definitiv futti ze maachen. Dës Kierchefeindlechkeet mécht och net virun der Oktav an der Sprangpréssessioun, déi zu eisem Patrimoine culturel gehéieren, Halt. D'ADR veruerteelt dëse reliouns- a kulturpolitesche Kalschlag op d'allerschäerfst.

## **Staat a Kierch sollen zesummen an net géintenee schaffen!**

D'chrëschtlech Relioun gehéiert zu eiser Geschicht, Traditioun a Kultur. An eis Kanner hunn e Recht drop, an hirer Relioun ënnerriicht ze ginn oder als Alternativ de Moralunterrecht ze wielen. Duerfir engagéiert d'ADR sech kompromësslos fir d'Erëm-Aféiere vum CHOIX, esou ewéi et an der Petitioun mat

ronn 26.000 Ënnerschrëfte gefuerdert gi war. Mir wäerten och de Verbuet vun der Co-Finanzéierung vun de Kierchen duerch d'Gemengen erëm ofschaffen, wat iwwregens eng flagrant Verletzung vun der Gemengenautonomie duerstellt.

## **Eis Kierchen a kierchlech Traditione sinn e wäertvollen Deel vun eisem kulturelle Patrimoine!**

Dat muss och an Zukunft esou bleiwen. D'ADR wäert derfir suergen, datt d'Kierch och an Zukunft am Duerf bleift... wann DIR, léif Wielerinnen a Wieler, eis esou stäerkt, datt dat politesch ëmgesat gi muss.

Nodeems d'CSV-Spëtzt deklariert huet, nëmmen eng Koalitioun mat enger vun deenen dräi Parteien agoen ze wëllen, déi an deene leschte fënnef Joer alles dru gesat hunn, fir d'Kierch futti ze maachen, sollt jiddereen, deem chrëschtlech Wäerter an Traditionen eppes bedeuten, alarméiert sinn: Nëmme wann d'ADR massiv gestäerkt gëtt, ass eng Remedur an e konstruktivt Zesummeschaffe vu Kierch a Staat méiglech.

**Duerfir de 14. Oktober:  
ALL ÄR STËMME FIR D'ADR!**